

ՀԱՂՈՐԴԱԳՐՈՒԹԻՒՆ

Կոչ – Բաց Նամակ

Հայկական Բարեգործական Ընդհանուր Միության

Պատկառելի Կեդրոնական Վարչության

Յունուար 19, 2014

Պրն. Պերճ Սեդրակեան, նախագահ,
Պատուարժան Անդամներ
Հ.Բ.Ը.Միության Կեդրոնական Վարչության,
Նիւ Եորք

Մեծայարգ Պրն. Սեդրակեան,

Այս կոչ – բաց նամակով կը դիմենք ձեզի վերաբանալու Մելգոնեան Կրթական Հաստատութիւնը մասնաւորաբար Սուրիահայ աշակերտներու համար:

Ինչպէս ծանօթ է ձեզի, վերջին շուրջ երեք տարիներուն Սուրիան կը գտնուի քաղաքացիական ահաւոր պատերազմի մէջ: Բոլոր կողմերը, առանց խտրականութեան կը կրակեն եւ կը ոմբակոծեն զիրար: Այս ահաւոր վիճակին անմեղ զոհերէն են Հալէպի, Դամասկոսի, Քամիշլիի, Քէսապի եւ այլ շրջաններու Սուրիահայութիւնը: Վստահաբար Ձեզի շատ աւելի մանրամասն լուրեր կը հասնին Սուրիայէն, հայերու կրած ծանր կորուստներուն եւ սպաննութիւններուն մասին: Բազմաթիւ հայ մանուկներ եւ պատանիներ զոհ կ'երթան ոմբակոծումներու կամ փամփուշտներու: Հայկական վարժարանները մասամբ կը գործեն, սակայն որեւէ վայրկեան կրնան ոմբակոծուիլ: Բազմաազար հայեր ստիպուած հեռացած են իրենց բնակարաններէն, հայկական թաղերէն եւ Սուրիայէն: Ոմանք հաստատուած են Հայաստան եւ Արցախ, ուրիշներ Յորդանան, Լիբանան կամ այլուր:

Սուրիահայ աշակերտները, մանուկներն ու պատանիները այսօր կ'ապրին ոչ միայն որեւէ վայրկեան սպաննուելու սարսափը, այլ նաեւ կ'ենթարկուին հոգեկան ահաւոր

ցնցումներու: Ապահովութիւն չկայ: Կեանքի պայմանները գրեթէ անտանելի են: Գիտենք որ Հալէպի կարգ մը շրջաններու մէջ շատ դժուար է ուտեստեղէն եւ խմելիք ջուր գտնելը: Անհրաժեշտ է անյապաղ փրկութեան ձեռք երկարել մեր Սուրիահայ պատանիներուն, անոնց կեանքերը փրկելու զանոնք փոխադրելով ապահով միջավայր:

Այս ահաւոր, անապահով կացութեան դիմաց, շատ տրամաբանական պիտի ըլլար ակնկալել որ Պատուարժան Վարչութիւնդ վերատեսութեան ենթարկելի Մելգոնեանը փակելու որոշումը եւ անյապաղ վերաբանար Մելգոնեան Կրթական Հաստատութիւնը, գլխաւորաբար Սուրիահայ աշակերտներուն համար: Վստահ ենք որ նիւթական պատճառները արգելք չեն այս ակնկալութեան: Մելգոնեանի փակումէն ետք, ութ տարիներու ընթացքին Բարերարներու Կտակէն կուտակուած եկամուտներու հսկայ գումարին վրայ կ'աւելնան նաեւ Մելգոնեանի հողին վրայ կառուցուած եկամտաբեր շէնքէն ապահովուած մեծ գումարները: Առաւել, քանի որ այդ աշակերտները գաղթականներ են, միջազգային զանազան կազմակերպութիւններ, ինչպէս ՄԱԿը, Կարմիր Խաչը, եւայլն, մեծապէս կը նպաստեն գաղթական աշակերտներու զանազան ծախսերուն: Վստահ ենք որ ձեր իրաւագէտներն ու հանրային յարաբերութեանց պատասխանատուները կրնան միջոցները գտնել Մելգոնեանը վերաբանալու եւ եկամուտի միջազգային աղբիւրները գտնելու եւ օգտագործելու:

Մելգոնեանը իր ներկայ վիճակով կրնայ շուրջ հազար աշակերտներու ապահով ապաստանարան տալ եւ որակաւոր ուսում ջամբել: Առաւել, կը վերահաստատուի Մելգոնեանի առաքելութիւնը որպէս դարբնոց հայեցի դաստիարակութեան եւ արեւմտահայերէն լեզուի պահապանման: Այս մարտահրաւերը պէտք է ըլլայ Հ.Բ.Ը.Միութեան առաջնահերթ ձեռնարկը: Ուրիշ ոչ մէկ հայկական կազմակերպութիւն կամ միութիւն, նոյնիսկ Եկեղեցին չեն կրնար այս առաքելութիւնը իրագործել:

Վերոյիշեալ ծանր եւ լուրջ պատճառները նկատի ունենալով, պաշտօնապէս կ'առաջարկենք որ վերատեսութեան ենթարկելով ձեր Մելգոնեանը փակելու որոշումը, անյապաղ վերաբանաք Մելգոնեան Կրթական Հաստատութիւնը: Որքան ալ որ գնահատելի է Սուրիահայութեան կարիքներուն յատկացուցած Միութեանդ մեծագումար օժանդակութիւնը, բայց եւ այնպէս Մելգոնեանի վերաբացումով շատ

աւելի հիմնական ու անգնահատելի բարիք մը գործած կ'ըլլաք Սուրիահայութեան, եւ մեծապէս կը նպաստէք Հ.Բ.Ը. Միութեան վարկին հզօրացման:

Կ'առաջարկենք նաեւ որ Հայաստանի յատկացուելիք Բարեգործականի գումարները առաւելաբար տրամադրուին Հայաստան եւ Արցախ հաստատուած Սուրիահայ գաղթականներու կարիքներուն: Այսպէտով թէ Հայաստանը եւ թէ Սուրիահայ գաղթականները կ'օգտուին: Կը վստահինք ձեր ազգասիրական ու բարեսիրական զգացումներուն եւ բարձր տրամաբանութեան:

Կանխայայտ Շնորհակալութեամբ՝

Խումբ մը Մելգոնեանցի Շրջանաւարտներ

Օանօթ: Կոչ կ'ուղղենք բոլոր այն հայորդիներուն որոնք համաձայն են Մելգոնեան Կրթական Հաստատութիւնը վերաբանալու գլխաւորաբար Սուրիահայ աշակերտներու համար, հաճին ամբողջացնել էլեքթրոնիք ստորագրութեան պատճէնը եւ զայն դրկել համապատասխան հասցէին:

Այցելել www.melkonianforever.org գլխաւոր էջը եւ ապա [Email](#) կամ [Feedback](#) ամբողջացնել:

Փափաքելի պիտի ըլլար նաեւ որ ձեր կարծիքները յայտնելիք Հայկական Բարեգործական Ընդհանուր Միութեան Կեդրոնական Վարչութեան, էլեքթրոնիք կամ պարզ նամակներով, կամ մամուլի միջոցաւ:

Շնորհակալութիւն